



LOVER

§ 1 Laget sitt namn

Laget sitt namn er Naustdal Båtlag, forkorta N.B.L.

§ 2 Formål

Laget sitt formål er å opparbeide, vedlikehalde og utvikle ei trygg og funksjonell båthamn for medlemmane i laget.

Arbeidet skal pregast av frivilligheit, demokrati, lojalitet og likeverd.

§ 3 Medlemskap

- a) Alle som aksepterer laget sine lover og reglar kan bli tatt opp som medlem i Naustdal Båtlag.
- b) Medlemskap kan nektast ved særlege høve. Styret si avgjerd kan klagast inn for årsmøtet.
- c) Medlemskap i båtlaget vert rekna frå den dag kontingent er betalt.
- d) Utmelding skal skje skriftleg.
- e) Medlem som etter purring ikkje betalar fastsett medlemskontingent tapar automatisk sitt medlemskap i laget og vert stroken frå medlemslista. Medlem som har tapt sitt medlemskap kan ikkje takast opp at før skuldig kontingent er betalt.

§ 4 Tillitsverv

- a) Berre medlem i Naustdal Båtlag kan ta tillitsverv.
- a) Eit medlem kan ikkje samtidig ha meir enn eit av følgjande verv i båtlaget: medlem av styret, valkomiteen eller revisor.
- b) Alle medlemmar i båtlaget pliktar å ta imot val. Ein kan nekte attval for like lang tid som ein har vore tillitsvald.

§ 5 Godtgjersle til tillitsvalde og refusjon av utgifter

- a) Tillitsvalde, komitear, utval kan ta i mot ei rimeleg godtgjersle for arbeidet sitt. Storleiken på godtgjersla skal gå fram i årsmeldinga.
- b) Tillitsvalde kan ta imot refusjon for nødvendige, faktiske utgifter som vedkomande får i samband med utføring av vervet.

§ 6 Inhabilitet

- a) Ein tillitsvald er inhabil til å leggje til rette grunnlaget for ei avgjerd eller til å treffe avgjerda:
 - 1) når vedkommande sjølv er part i saka
 - 2) når vedkommande er i slekt eller svogerskap med ein part i oppstigande eller nedstigande linje eller i sidelinje så nær som søsken.
 - 3) når vedkommande er eller har vore gift med eller er forlova eller sambuar med ein part.
- b) Sameleis er vedkommande inhabil når andre særreigne tilhøve ligg føre som er eigna til å svekke tilliten til om vedkommande er upartisk; mellom anna skal det leggjast vekt på om avgjerda i saka kan gi særleg fordel, tap eller ulempe for vedkommande sjølv eller nokon som vedkommande har nær personleg tilknytning til. Det skal og leggjast vekt på om inhabilitetsmotsegn er reist av ein part. Med part er det her meint person, medrekna juridisk person, som ei avgjerd rettar seg mot eller som saka elles direkte gjeld.
- c) I styret, komitear, utval tek organet sjølv avgjerd, utan at vedkommande medlem deltek. Dersom det i ei og same sak kjem opp spørsmål om inhabilitet for fleire medlemmer, kan ingen av dei delta i avgjerd av sin eigen eller ein annan medlem sin habilitet, med mindre organet elles ikkje ville vere vedtaksført i spørsmålet. I sistnemnde tilfelle skal alle møtande medlemmer delta. Medlem skal i god tid seie frå om tilhøve som gjer eller kan gjere vedkommande inhabil.
- d) Regelen om inhabilitet gjeld ikkje på årsmøte eller ekstraordinært årsmøte.

§ 7 Rekneskap, revisjon, budsjett mv.

- a) Båtlaget sitt rekneskap følgjer kalenderåret.
- b) Rekneskapan til båtlaget skal reviderast av 2 valde revisorar.
- c) Rekneskapet skal leverast til dei valde revisorane for revisjon seinast 15.2
- d) Revidert rekneskap skal leverast styret seinast 1.3
- e) Båtlaget kan ikkje gi lån eller stille garantiar for lån.
- f) På årsmøte skal det fastsetjast budsjett som inneheld alle hovudpostar i resultatrekneskapan. Budsjettet skal vere realistisk, og resultatet skal ikkje vise underskot med mindre det vert dekt av positiv eigenkapital.

§ 8 Årsmøte

- a) Årsmøte er laget sitt høgaste styringsorgan og skal haldast kvart år innan utgangen av mars månad. Årsmøte vert leia av vald ordstyrar.
- b) Forslag som skal handsamast på årsmøte må vere sendt styret innan 1. februar.
- c) Styret kallar inn til årsmøte minst 2 veker på førehand på laget si heimeside.

Sakliste og andre nødvendige saksdokument med forslag skal vere tilgjengeleg på heimesida saman med innkallinga.

- d) Berre saker som er ført opp på utsend/kunngjort sakliste skal handsamast på årsmøte, men andre saker kan handsamast når 2/3 av dei frammøtte med stemmerett på årsmøtet vedtek det, ved godkjenning av saklista.
- e) Ved innkalling i strid med regelen, avgjer årsmøte høvesvis ved godkjenning av innkalling og godkjenning av saklista, om årsmøtet er lovleg innkalla og om det er saker som ikkje kan handsamast.
- f) Alle medlemmar i båtlaget har tilgjenge til årsmøtet. For å ha tale- og stemmerett og kunne veljast på årsmøte må ein ha vore medlem av båtlaget i minst 3 månader.
- g) Årsmøte er vedtaksført dersom det møter eit tal medlemmar med stemmerett som minst svarar til tal styremedlemer vedteke i laget si lov. Dersom årsmøtet ikkje er vedtaksført, kan det kallast inn til nytt årsmøte utan krav om minimumsdeltaking.

§ 9 Årsmøte sine oppgåver

Årsmøte skal:

1. Godkjenne dei som har stemmerett
2. Godkjenne innkalling og sakliste
3. Velje ordstyrar, referent og 2 medlemmar til å skrive under årsmøterefaratet
4. Handsame laget si årsmelding
5. Handsame laget sitt rekneskap i revidert stand
6. Fastsetje medlemskontingenten
7. Fastsetje årleg avgift for 4m, 6m og 8m båtplass
8. Fastsetje innskot for 4m, 6m, og 8m båtplass
9. Fastsetje timegodtgjersle for dugnad
10. Handsame innkomne saker
11. Vedta laget sitt budsjett
12. Vedta investerings- og vedlikehaldsplan. Planen skal rullerast kvart år.
13. Gjere følgjande val:
 - Leiar, nestleiar, sekretær, kasserar og styremedlem
 - 2 revisorar
 - Valnemnd med leiar og 1 medlem

Leiar vert vald for eitt år. To styremedlemer for eitt år og to styremedlemer for to år. Revisorane og valnemnd vert valde for høvesvis eitt år og to år.

§ 10 Stemmegjeving på årsmøte

- a) Med mindre noko anna er fastlagt i denne lova, skal eit vedtak, for å vere gyldig, vere gjort med vanleg fleirtal av dei avgjevne stemmene. Ingen representant har meir enn ei stemme. Ingen kan møte eller stemme med fullmakt. Blanke stemmer skal reknast som ikkje avgjevne.
- b) Alle val der det ligg føre eit framlegg vert gjennomført med handsopprekking. Val der det ligg føre meir enn eit framlegg vert gjennomført med handsopprekking, med mindre det vert fremja krav om skriftleg val.

- c) Ved val på tillitsvalde der det ligg føre meir enn eit framlegg, skal det vere skriftleg val. Det er berre føreslegne kandidatar som kan førast opp på stemmesetelen. Stemmesetlar som er blanke, eller som inneheld kandidatar som ikkje er føreslegne tel ikkje og stemmene skal reknast som ikkje avgjevne.
- d) Når eit val vert halde enkeltvis, og ingen kandidat oppnår meir enn halvparten av dei avgjevne stemmene, skal det vere omval mellom dei to kandidatane som har fått flest stemmer. Står kandidatane likt etter omvalet, vert valet avgjort ved loddtrekning.

§ 11 Ekstraordinært årsmøte

- a) Ekstraordinært årsmøte i Naustdal båtlag vert innkalla av styret minst 14 dagar på førehand etter:
 - Vedtak på årsmøtet i båtlaget
 - Vedtak i styret i båtlaget
 - Skriftleg krav frå 1/3 av dei medlemmane i båtlaget som har stemmerett
- b) Innkalling til ekstraordinært årsmøte vert kunngjort på laget si heimeside. Sakliste og andre nødvendige saksdokument med forslag skal vere tilgjengeleg på heimesida saman med innkallinga.
- c) Ekstraordinært årsmøte er vedtaksført dersom det møter ei tal medlemmar med stemmerett som minst svarar til tal styremedlemer vedteke i laget si lov. Dersom årsmøtet ikkje er vedtaksført, kan det kallast inn til nytt ekstraordinært årsmøte utan krav om minimumsdeltaking.
- d) Ekstraordinært årsmøte skal berre handsame dei sakene som er med i vedtaket eller i kravet om innkalling av årsmøte.

§ 12 Lovendringar

Endringar i denne lova kan berre vedtakast av ordinært eller ekstraordinært årsmøte i båtlaget og som er ført opp på utsend/kunngjort sakliste. Lovendringar krev 2/3 fleirtal av dei frammøtte med stemmerett.

§ 13 Styret

- a) Naustdal Båtlag vert leia av eit styre som er vald av årsmøtet. Styret er båtlaget sitt høgaste styringsorgan mellom årsmøta. Styret i båtlaget har slik samansetjing:
 - Leiar
 - Nesteleiar
 - Skrivar
 - Kasserar
 - Styremedlem
- b) Styret er ansvarleg ovanfor årsmøtet. Styret skal halde møter når leiaren bestemmer det eller eit fleirtal av styremedlemmene krev det.
- c) Styret er vedtaksfør når eit fleirtal av styret er til stades. Ved likt stemmetal er leiar si stemme avgjerande.

- d) Styret har økonomisk handlefridom innanfor budsjetttrammer godkjent av årsmøte.
- e) Styret kan nemne opp naudsynnte utval og nemnder til hjelp i arbeidet.
- f) Styret skal:
 - Følgje opp vedtak gjort av årsmøte.
 - Styre etter laget sine lover og hamnereglar fastsett av årsmøte.
 - Sjå til at laget har tilfredstillande organisering av rekneskap- og budsjettfunksjonen, og har forsvarleg økonomistyring.
 - Organisere dugnad og vedlikehald av båthamna og føre oversikt over utførte dugnadstimar per år.
 - Representere laget utetter.
 - Føre referat frå styremøter.
 - Fastsetje straum- og dieselpriis i båthamna og ev. gebyr/leigeprisar mv.
 - Føre oversikt over alle båtplassar. Av oversikta skal det gå fram namnet til eigaren av båtplassen.
 - Føre medlemslister.
 - Føre venteliste for båtplass. Av oversikta skal det gå fram namn og adresse til kvar person som står på venteliste.
 - Utnemne hamnesjef(ar)
 - Halde internettsida www.naustdalbaatlag.com oppdatert.

§ 14 Tildeling-, sal-, overdraging og venteliste av båtplass

- a) Det berande prinsippet skal vere at medlemmane eig båtplassane, men tildeling, sal og overdraging av båtplass kan berre skje av styret i båtlaget. Styret fører liste over eigarar av båtplassar og venteliste for tildeling av båtplass. Listene er tilgjengeleg på laget si heimeside.
- b) For å få tildelt båtplass må ein stå oppført i båtlaget si venteliste og vere medlem. For å stå på venteliste vert det kravd eit gebyr. Tildeling av båtplass skjer etter ansiennitet, men medlemmer busett i Naustdal kommune har førerrett. Det vert kravd eit eingongsinnskot ut frå storleiken på båtplassen. Først når eingongsinnskotet er betalt er ein eigar av båtplassen.
- c) Ein båteigar som har båtplass, men som ønskjer ein mindre eller ein større båtplass, må sette seg på venteliste.
- d) Eigar av båtplass som ønskjer å selje båtplassen skal gi melding til styret. Årsgebyr skal vere betalt av seljar. Refusjon av innskot vert utbetalt førre eigar når styret har motteke innskot frå ny eigar med frådrag av årsgebyr.
- e) Båtplass som ikkje vert seld kan leigast ut for eit år om gongen av styret. Leiga tilfelle eigaren av båtplassen. Årsavgift skal betalst så lenge ein er eigar av båtplassen, også i den tid ein har båtplassen for sal.
- f) Eigar av ein båtplass kan overdra båtplassen sin til; foreldre, egne barn, sysken, ektefelle eller sambuar. Ved død gjeld dei same reglane. Den som overtek båtplassen må vere medlem i båtlaget. Overdraging av båtplassen kan berre skje ved at styret er

informert om namnet og adressa til den nye eigaren og det er godtgjort overfor styret at vilkåra er oppfylt.

- g) Ein person som står på venteliste kan ikkje overdra plassen til andre. Ved død blir vedkommande stroken frå ventelista.
- h) Styret kan endre/byte på tildelt båtplass. Endring/byte av båtplass skal grunnleggjast og den/dei som vert omfatta skal få høve til å uttale seg før styret tek endeleg avgjerd.

§ 15 Dugnad

- a) Eigiar av båtplass er pliktig til å gjere minst 5 timar dugnad per år.
- b) Dugnadsliste blir lagt ut på laget si heimeside, www.naustdalbaatlag.com seinast 1. mai kvart år og kvar båtplasseigiar har sjølv plikt å melde seg på dugnad til den som er oppgjeve som kontaktperson.
- c) Båtplasseigiar er sjølv ansvarleg for å melde inn kva dugnad som er utført og tal timar som er brukt.
- d) Kvar dugnadstime vert godtgjort med den timesats som er vedteke av årsmøte.
- e) Styret fører oversikt over tal dugnadstimar og utbetaling for dugnadstimar skal vere gjort innan 31.12.

§ 16 Breidde og lengde på båtplassar i båthamna

- a) Breidde på båtplassar i båthamna, målt senter-senter, mellom kvar bryggjeplass er:
 - 4 meter plass skal vere 2.60 meter brei
 - 6 meter plass skal vere 3.10 meter brei
 - 8 meter plass skal vere 3.60 meter brei
- b) Maks lengde for båtar i flytebryggene er 10.5 m (34.5 fot)

§ 17 Utleige/utlån av båtplass

- a) Utleige/utlån av båtplass skal godkjennast av styret.
- b) Eigiar av båtplassen er pliktig å informere styret om namn og adresse til den som skal leige/låne ein båtplass og skal forsikre seg om at han/ho er medlem av båtlaget. Lover og reglar for Naustdal Båtlag gjeld og for den som skal leige/låne ein båtplass.
- c) Utlån/utleigepris kan ikkje overstige den årlege leiga for gjeldande båtplass som er vedteke av årsmøte.
- d) Ved utleige/utlån av båtplass skal eigiar av båtplassen betalte årsavgift, medlemskontingent og eventuelt andre gebyr fastsett av årsmøte til båtlaget.

§ 18 Tilgang til båthamna, opplag for fritidsbåtar, orden og reinsemd

- a) Det er berre medlemmer eller den som eit medlem gir løyve til, som har tilgang til flytebryggene og båtplassar. Besøkande skal kunne legge fram legitimasjon.

- b) For å ha båtar i opplag i båthamna må dette vere avtalt med styret og hamnesjefane.
- c) Alle båtar må leggjast på tildelt plass. Alle båtar må vera forsvarleg fortøyde og fendra. Fortøyningane må ikkje vere til hinder for andre. Båteigar pliktar å lense båten og halde tilsyn med den.
- d) I båthamna skal det til ei kvar tid herska orden på alle måtar, og alle medlemmane pliktar å sjå til at dette skjer. Det er forbode å kaste avfall av alle slag i hamneområdet. Det er ikkje høve til å lagre utstyr og anna i buene. Fiskeavfall skal ikkje kastast på innsida av moloen.

§ 19 Medlemskontingent, eingongsinnskot, årsavgift og andre avgifter

- a) Medlemskontingent, eingongsinnskot, årsavgift og eventuelle andre avgifter for dei ulike båt plassane vert fastsett av årsmøte.
- b) Eingongsinnskotet for dei ulike båt plassane skal kvart år justerast etter konsumprisindeksen til SSB.
- c) Medlemskontingent, årsavgift og eventuelt andre avgifter som årsmøte fastset, følgjer kalenderåret og forfell til betaling seinast 1. juli kvart år.

§ 20 Manglande betaling av kontingent og avgifter av båt plassen

Eigar av båt plass som etter ein purring ikkje betaler medlemskontingent eller årsavgift eller andre avgifter fastsett av årsmøte, vil miste retten til å eige båt plass i båthamna.

Styret skal skriftleg informere eigar av båt plassen om skuldig beløp og at båt plassen vert seld dersom han/ho ikkje har gjort opp for seg innan 4 veker.

Eigar skal få utbetalt eingongsinnskot med fråtrekk av skuldig beløp, eventuelle kostnader båt laget må ha med å fjerne båt mv. og eit gebyr på kr. 5.000,-

§ 21 Skadar/ansvar

- a) Båt laget er utan ansvar for skader og hærverk på båtar, tjuveri eller innbrot, skader på materiell eller personar i eller i tilknytning til båthamna.
- b) Båt laget er ikkje ansvarleg for skade som måtte oppstå på grunn av svikt i hamneområdet eller –innrettingane.
- c) Bruk av slipp eller anna utstyr i båthamna skjer på eige ansvar.

§ 22 Brot på lover og reglar

- a) Styret kan ekskludere medlemmar som bryt med båt laget sine lover eller på anna måte handlar i strid med reglar for hamneområdet.
- b) Melding om eksklusjon skal gjevast skriftleg og grunngjevast. Styret sitt vedtak kan ankast inn for årsmøte.
- c) Eit medlem som blir ekskludert vil ikkje kunne eige båt plass i båthamna.

§ 23 **Opplysning – Samanslåing**

- a) Forslag om oppløysing av båtlaget må først handsamast av ordinært årsmøte. Vert oppløysing vedteke med minst 2/3 fleirtal, skal det kallast inn til ekstraordinært årsmøte 3 månader seinare. For at oppløysing skal skje, må vedtaket også her gjerast med 2/3 fleirtal.

- b) Samanslåing med andre båtlag vert ikkje rekna som oppløysing av laget. Vedtak om samanslåing og nødvendige lovendingar knytt til dette skal gjerast i samsvar med vedtektene om lovending.